



Tir Yimym

www.tiryimym.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimym@gmail.com

TAPAK 7 Yangia anidakangma : Tir Yimym tir_yimym

tir yimym TAPAK 7

Taoba mapang Puducherry Chief Minister Ramachandran süogo

S Korea tir Yoon linük adena maotsü tenokdangba agütsü

VOL. XXII ISSUE NO. 61 (ADOK 61) DIMAPUR SANGTENNÜ (TUESDAY) LUCHII (DECEMBER) 10, 2024 ₹ 5.00

Tide-over rice scheme nung Rs. 952 crore tim mesüi amshiogo: ACAUT

Dimapur, December 9, 2024 (TYO): 2018 nungi tang tashi nung Food and Civil Supplies department kübok Rs 952 crore tim mesüi amshiogo ta Against Corruption and Unabated Taxation (ACAUT) Nagaland-i tai tongloktür.

Food and Civil Supplies department kübok tide-over rice scheme timi meinyakba kulikakettem parnok ket nung lir ta ACAUT-isa ashi.

"Iba scheme ya 2018 küm Centre-i tenzüker aser iba atema Nagaland-i ita shia jang 3872.72 MT angur. Iba scheme kübok anguba jang ya seret nung Rs 8.30 agi ayoktsüba lir. Ajsüüka tesümgangtsü kaji Nagaland nung nil beneficiaries lir" ta parnok ashi.

Tesüba küm tenet tsüingda Food Corporation of India nungi jang 3,17,563 MT nguogo ta ACAUT-isa ashi.

"Jang ya miima belen aser

open market nung yokdok ta amanger. Onoki bushisüingdanga arudang market nung rice brands tenüing aika adoka ayoker. Parnoki jang ya India kübok state balala nungi bener arur ta ashir saka Nagaland state atema tide-over rice bosta tasen nung sepshir aser merükterer ayokba dang lir" ta ACAUT-isa metetdaksü.

"Nagaland-i tangalen nungi jang bener arubaji Basmati dang lir. Jenjang dalang agi ayoktsüba jang nung sen aika temloker public dang ayoker. Open market nung jang seret nung Rs 30 agi dang ayok nunga Rs. 952 crore tashi amshir" ta parnok ashi.

Sorkar nungi temelaba melii iba mapa inyaktysü makok anungji Lokayukta-i iba atema ken o benoker bushisüingdang asütsü ayongzüker. Ajsüüka yamaji meinyakra onoki ozüing kübok temeten bushitsü ta ACAUT-isa metetdaksü.

Nagaland nung North East Tech Summit 2024 among

Kohima, December 9, 2024 (TYO): Nagaland sorkari Hombarnü RCEMPA Jotsoma nung North East Tech Summit 2024 ketdangsüa agiogo.

Iba summit ya entrepreneurial ecosystem ajungketba sabang ka lir aser tasen purapitetertemi technology amshitsü tashi agütsür ta Department of Information Technology &

Communication Advisor Sethrongkyu Sangtam-i ashi.

Iba summit ajanga India tesem balala nung summit aser Nagaland nung tang tasen tenzükerba start-ups tsüingda tesentaktep yanglutsü. State sorkari tech sector yaritsü tenangzükerba lir aser lanurtem nem maangka balala agütsütsü, ta Advisor Sethrongkyu-isa ashi.

Mangkolemba nung fire station ka amenoktsü mepishir

Dimapur, December 9, 2024 (TYO): Deobarnep Mokokchung district kübok Mangkolemba jila nung kitsükkirong lendong tulu ka atalokba sülen Transport and Technical Education Advisor Temjenmenba-i Mangkolemba nung fire station ka amenoktsü mepishia shidi ka zülüogo.

MLA Temjenmenba-i Fire & Emergency Services, Home Guard, and Civil Defence Advisor S Kiusumew Yimchunger dangi züluba shidi nung Mangkolemba aser iba temeket nung aliba yimtsüingtem asoshi fire station maliba shia lir.

December 8, 2024 nü Mangkolemba nung kitsükkirong lendong tulu ka atalokogo aser iba ajanga nisung aika talidak mali kümdaksü aser crore aika jenjang osettem rongdok. Iba tesem nung fire station ka ali asübo lendong tulu nungi jembula ta Temjenmenba-i ashi.

Anungji Mangkolemba nung fire station ka amenoktsü atema senotsü lemzüksütsü mepishir ta paisa ashi.

Külen, Ao Kakatshir Mungdang (AKM)-ia tanga sangdong ka nung MLA & Advisor Temjenmenba-i ashiba

pusemba metetdaksüogo.

Mangkolemba sub-division ya Nagaland nung sub-division tejentiba rongnung ka lir. Iba sub-division kübok Jangpetkong, Japukong aser Tzurangkong dena lir saka gari lenmang majungba den sorkari senzüka yutsür, ta AKM-i ashi.

Sorkari iba tebilemstü ya süoki ia agizüktsüla aser tekaratiba nung Fire Station service agütsütsüla ta parnokisa ashi.

Deobarnep 10:00 ako meta electrical short circuit ka ajanga Mangkolemba jila nung ki pungu, dokan ana aser godowns rongdok ta ADC headquarters-i ashi.

Mangkolemba nung alirtemi kanga meranga ghonda ka sülen ang mi enseptet ta pai ashi.

Asükwä mapang asüba agi Mangkolemba nung tzü agi anünger aser iba jagi nübertemi PHED pipelines ana toktanger ang mi enseptet ta Mangkolemba Town Council (MTC) Chairperson-ia ashi.

Iba lendong nung Rs. 2.5 crore shi ki oset aser tanga osettsüset akoksaogo aser tang atema MTC-i takoksa ajuruba kibong shia nem Rs. 1,000 agütsüogo ta MTC Chairperson-isa metetdaksü.

Hornbill Festival nung nisung lakh 1.73 denogo



Naga Heritage Village, Kisama nung December 9, 2024 nü Sumi Cultural Troupe-i alemli mi apudetba ia sayuba angur.

Kohima, December 9, 2024

(TYO): Naga Heritage Village, Kisama nung 25 buba Hornbill Festival anogo tugububa tashi nung nisung lakh 1.73 aruogo aser iba ya yaküm arurtem dang nungi teimba lir.

2023 nung nisung ajak agi 1,54,057 aru aser parnok rongnung local 1,14,860, domestic tourists 37,089 aser bendanger 2,108 dena liasü.

Ajsüüka taküm nisung 1,73,887 aruogo aser parnok rongnung locals 1,23,409, domestic tourists 48,103 aser bendanger 2375 liasü ta Tourism Joint Director Toka E. Tuccumi-i ashi.

Taküm benjung nung anogo tibuba nung nisung 26,274 aruba teimtiba liasü aser anogo pezünübuba tajemtiba (14,502) liasü, ta pai ashi.

Hombarnep Cultural Extravaganza session nung Forest, Environment and Climate Change, Village Guards Minister C.L. John-i host aser Urban Development and Municipal Affairs Advisor Zhaleo Rio-i co-host shilem agi.

Sentong nung Sikkim High Court Chief Justice Justice Biswanath Sommader, Global Partnerships at Meta, India Director Paras Sharma aser

Executive Director & State Head of Indian Oil AOD, Guwahati Rajesh Nambair nungeri tetushi süa jaokertem ama shilem agi.

Anüngdang session nung Nagaland Legislative Assembly Deputy Speaker S. Toiho Yeptho-i host aser Water Resources Advisor Tongpang Ozukum-i co-host shilem agi.

Anüngdang session nung tetushi süa jaokertemi Union Public Service Commission (UPSC) Member Sanjay Verma aser General Officer Commanding 3 Corps Lt Gen. Abhijit S Pendharkar, AVSM, YSM na liasü.

Opposition-i PM Modi aitsür; Biren dang CM menden toktsütsü akhanger

New Delhi, December 9, 2024

(Agencies): Hombarnü Opposition lennirtemi New Delhi nung Jantar Mantar nung adenshir Prime Minister Narendra Modi aitsüogo aser Manipur tensa atema tebilemstü khuret abentsü takhangba agütsüogo.

Congress MP Jairam Ramesh aser CPI lennir D Raja nati tang rongdak teinyaktsü kar inyaktü takhangba agütsü.

Tenatisa Manipur Chief Minister mapa nungi anentsü aser Prime Minister-i Manipur asoshi

inyaktü takhangba agütsü. INDIA teloktepi PM Modi dang Manipur tebilemstü atema jembitsü akhanger ta Jairam Ramesh-i ashi.

"Prime Minister-i alima tesem balala sema senzür saka ita 18 tashi mepetmesütepa aruaka Manipur khen danga mesemdang. Manipur Chief Minister-i yimjung bener maruteter anungji pa mapa nungi anentsüla. PM-i ola adoktsüla, Manipur semdangtsüla aser idakji mongzüker nübertem

timtem angatetsüla" ta Ramesh-i ashi.

"PM Modi aser BJP-i mapang shia 'linük mezüing' indang jembir. Süra Manipur ya linük nung shilem ka asü masü? Kechiba PM-i iba tebilemstü atema ola madoker? Kechiba sorkari Manipur atema parliamentary o atsütepba melinür? Manipur tensa kanga majung lir aser nübertem timtemer aser yimten telatetba kecha mangur. Chief Minister-i mapa nungi anentsüla" ta CPI lennir D Raja-ia ashi.

Parliament nung "One Nation, One Election" bill benoktsü akok

New Delhi, December 9, 2024

(Agencies): Centre-i One Country One Election mapatong tenzüksü renema lir aser tan Parliament session nung bill ka benoktsü akok.

Iba bill ya Lok Sabha aser state assembly elections külemi agitsü atema nükjidong lir aser Union Cabinet-ibo mulunga agizükogo.

Taoba President Ram Nath Kovind-i aniba committee-i One Country One Election atema report agütsüba Cabinet-i agizükogo aser Centre sorkari iba bill ya benokba sülen Joint Parliamentary Committee (JPC) ka nem agütsünür.

JPC-i political party ajak nungi teshimtet nübotem den ajurutepa olemteptsü. Iba maparen nung sendaktepa alirtem dendaktsütsü aser linük nung state assembly balala nung Speaker tem den shisashirtem

jateptsü akok.

Centre sorkari mezüing atema iba bill nung nübertem dendaktsünür kechiyong tang teinyakdak mapa ka melentsü asoshi ajaki mulunga agizüktsü nüngdaker.

"One Nation One Election" sentong mapa küma inyaktü asoshi Constitution yanglushits atema bill 6 shi nüngdaksü aser sorkari Parliament nung nübo asemstü nungi anabosa nüngdaksü.

Parliament house anaprong nung NDA nübo teimba lir saka asemstü nungi anasü angutsüba ji mapa tasak asütsü.

Rajya Sabha nung menden 245 aliba nung NDA nübo 112 aser Opposition 85 lir. Nübo asemstü nungi ana angutsü atema sorkari votes 164 bosa nüngdaker.

asemsü nungi anasüji 364 lir.

Centre sorkari mapang tatsüka linük nung elections ajak mapang ka nung külemi agitsü jembia arur. Mapang balala nung election agiba ajanga mapang, sen aser nübo endoker ta parnok ashir.

Külen election magidang Model Code of Conduct benokba ajanga terenlok mapa nung tetsükdaksü ajurur ta Centre-i ashir.

Ajsüüka Opposition-i iba ya mapa küma meinyaktetsü ta ashir. Mapang kasa nung elections agitsüba ji Election Commission atema tayongzükerba tulu lir kechiyong state elections nunga shilem balala lemsar agitsüsa akümer ta parnok ashir.

Mapang ka nung elections külemi agitsüba ya democracy aser temzüing anema lir ta Opposition-isa metetdaksüogo.

Kovind report nung "One Nation One Election" ta 2029 sülen ang inyaktetsü ta shia lir.

Dimapur DPDB senden DC Conference Hall nung menogo



Deputy Commissioner, Dimapur, Dr. Tinojongshi Chang, NCS lenisüba kübok Hombarnü (December 9, 2024) DC Dimapur indang Conference nung DPDB senden amendang tangokba noksa nung angur.

Dimapur, Luchii/December 09 (TYO): Dimapur District Planning and Development Board (DPDB) pur December ita atema senden Deputy Commissioner, Dimapur indang Conference Hall nung December 9, 2024 nü Deputy Commissioner & Vice Chairman, DPDB Dimapur, Dr. Tinojongshi Chang, NCS lenisüba kübok mena liasü.

Senden tenzüka DC Dimapur-i züngsem tasen Thungchanbemo Tungoe, CEO, Dimapur Municipal Council aser Er. HutiviSwu, Executive Engineer, Water Resources Department pela agizüka liasü.

Iba sülen Board ajanga nung aliba Wotsa Fine Arts

College upgrade asütsü inyakba asadanga liasü aser sorkar dangi yok.

Parnokisa Public College, Dimapur indang registration renewal atema agizüker tim department dangi yoka liasü.

Society registration asütsüba onük benokba nung Dimapur Sakshi Union; Sakshi Cultural Society; United Baptist Church Convention; Coal Mining Association Nagaland; United Kachari Baptist Church Association aser Sumi Baptist Church indang jembir Board-i agizük aser sorkar dangi yok.

District nung agricultural productivity asendenshitsu nükjidong nung Agriculture Department ajanga inyakba project aser maparen balala

indang PowerPoint presentation iba senden nung agüja liasü.

Yamaji Horticulture Department-ia Dimapur nung horticulture asoshi sentong yanglua inyakba aser takok anguba lemsatepa liasü.

Sentong tembanga DC Dimapur-i Lok Sabha aser Municipal elections tajungtiba nung sunepa agitettsüsa ketdangsür aser staff temi yaritepba asoshi pelaba lemsatep.

Departmental sports week takok ngua ayongzüka nung department balalai senotsü aser nübu agi yariba atema tenüngsang agütsü aser tarutsü anogotem nunga maneni külemi inyaksü ayongzüka liasü.

Hornbill kumzükang aser wazüka yuang

Dimapur, Luchii/December 09 (TYO): Tenem (hornbill) ozü aser Naga nung sobaliba tsüngta tesendaktep tajung aliba angateta Department of Environment, Forest and Climate Change ajanga chichiba tenem züng melen danga amshitsü atema tetoktepba ka 2023 nung agia liasü aser iba tetoktepba nung takok angur ya Architech Shanjo A. Kithan aser Archetic, Sentilong Imchen liasü.

chichiba melen amshitettsüsa danga lenmang lir ta nüburtem nem awareness agütsütsü mechi taküm department ajanga item takok anguri yanglutetba ya taküm stall nung sayur aser iba yagi nüburtemi sübosolemsü nung chichiba tenem züng melen danga amshitsü ajungmesotsü imlar.

Parnoki yangluba tezüng ya ngua tesemdanger temi temulung süa agizüktar aser iba yagi Nagaland nung kanga ajema aliba tenem wazüka ayutsü imlar.

NBHM ajanga Kisama nung Honey Hub lapoka lir



Nagaland Beekeeping & Honey Mission ajanga Naga Heritage Village, Kisama nung Hornbill Festival mapang 'HONEY HUB' nung parnoki yanglutetba osettem sayuba noksa nung angur.

Dimapur, Luchii/December 09 (TYO): Nagaland Beekeeping & Honey Mission (NBHM) ajanga Naga Heritage Village, Kisama nung tang temungdak 25 buba Hornbill Festival mapang "HONEY HUB" nungja agütsür honey pavilion ka lapoka lir.

parnoki renemba oset tem sayur aser ayoker.

Viswema Village Beekeeping Committee, Khonoma Basa Vandhan Vikas Kendra, Tsemnyu district nungi Chwida Rocky Mountain Honey aser Mima Honey kübok Honey entrepreneurs temi

NBHM indang stall nungya Honey (ninang mojitzü) tabu asem angur - Apis Cerana honey, Rock bee mesüra wild honey aser Stingless honey - aser iba den lip balms aser massage balms ama ninang mojitzü agi yangluba osetta ayoker.

NBHM indang stall ya advertisement aser temaba jenjangi ajungkettsü atema lir. Iba pavilion nungya Honey beverages aser confectionery den chiyongtsü balala angur.

Tanü Toyota Hornbill Music Festival nung Big Mountain-i shilem agitsü



Kohima, Luchii/December 09 (TYO): Kisama nung Toyota Hornbill Music Festival 2024 tenzüker tokunü buba nung Gini (Meta), Sejal (Meta), Kivito, Avora Records, The Gluttones aser Mother Jane nungeri ken tena liasü.

December 10 nü shilem agitsü lir.

Taküm iba benjongmung nung international aser local sempet balala sayua arur.

Big Mountain ya San Diego, California nungi lir aser parnoki alima tesem balala nung reggae, pop aser rock ken adener.

Parnok kensü ola tajung den tetetzük tajung aser parnoki

yimya balala amshiba ajanga alimai parnok jangja lir.

Hornbill Festival tatem aonung Big Mountain den külemi Alobo Naga, Tetseo Sisters, DJ Olly Esse aser Nagaland Folkloric Group nungi shilem agitsü. Iba concert ya Main Arena, Naga Heritage Village, Kisama nung nikongdang 5:00 ako nungi tenzüksü.

Merennungsang Lemtor-i Naga Chef Season 11 akok



Naga Heritage Village, Kisama nung 25 buba Hornbill Festival mapang Naga Chef Season 11 takok angur Merennungsang Lemtor-i December 9, 2024 nü tetendanger ket nungi sempet agizükba noksa nung angur.

Dimapur, Luchii/December 09 (TYO): Naga Chef Season 11 finale ya Naga Heritage Village, Kisama nung December 9, 2024 nü agia liasü, kong Gaily T Trakha, Hamngam Linghoikim Hengna, Merennungsang Lemtor aser Pfutsuvelo Ladu nungertem toktepa liasü.

Tanüngba finalists asem nem sempetlep agüja liasü.

Iba tetoktepba nung Merennungsang Lemtor-i Naga Chef Season 11 takok ngua senpet sen lakh asem angu.

Naga Chef Season 11 atema tetendangerterem ya Rovi Chasie, Alemjungla Jamir, Kevitsu Doze, Nune Chase aser Vekutholü Vero nungertem liasü.

Naga Chef ya Synergy Group Enterprise ajanga ayongzüker aser Department of Tourism, Government of Nagaland-ia yaria liasü.

Ato Mor-i 2024 HIPFEST Photo-grahy tetoktepba takok angu

Dimapur, Luchii/December 09 (TYO): Kanga yongya ataba 2024 HIPFEST Photography Competition nung takok angur osang ya December 9, 2024 nü sangdonga liasü.

sayuteta liasü.

Iba tetoktepba nung tetendanger ya Singapore nungi Yip Yew Chong aser Nagaland nungi Kekhriezhaso Miachieo aser Narayan Bahadur liasü aser parnoki category balala nung noksa tangoka aliba asadanga tendanga liasü.

Ato Mor-i tematiba jenjang,

Viketso Meyase-i tanabuba aser Parvej Akhtar-i tasembuba jenjang angu.

Category awart nung Keyi Putlang-i Best Portrait category sempet angu, Sashikala Jami-i Best Landscape Photograph sempet angu aser Neilar Mepfhuo-i Best Wildlife Photograph sempet ngua liasü.



December 09, 2024 nü Jaipur nung Ato kilonser, Narendra Modi-i Rising Rajasthan Global Investment Summit tenzüksüdang tangokba noksa nung angur. Kasa noksa nung Rajasthan Angh, Haribhau Kisanrao Bagde aser Chief Minister Bhajanlal Sharma nata angur.

Bima Sakhi Yojana ajanga tetsürtem atema mapa adoktsü: PM

New Delhi, Luchii/December 09 (Agencies): Hombarnü Haryana kübok Panipat nung Ato kilonser, Narendra Modi-i 'LIC Bima Sakhi' scheme tenzüksüogo.

Iba sentong nung jembidang Ato kilonser Modi-i, BJP sorkari state nung terenlok kanga kera akatsü atema inyaksü, ta metetdaksü.

Modi-isa, tesüiba küm 10 tsüngda Centre sorkari tetsürtem nem tashi agütsüsü atema sectors balala nung telemetba aika agia inyakogo; item sectors rongnung defence, banking aser aluyimba densema lir, ta metetdaksü.

Tetsürtem tejakleni aotsü atema maangka angutsüji kanga tongtibang; tetsürtem nem tashi agütsüra parnok jakdang tetsükdaksü ajak agientsü, ta pai ashi.

Tejakleni aotsü atema

kodang tetsürtem nem tashi agütsüdir ibaji ajanga linük atema maangka kishi aika lapoker, ta pai ashi.

'Bima Sakhi Yojana' scheme ya LIC indang lir, aser iba ya class 10 pass sür alir arrshi küm 18 nungi 70 tsüngdapur tetsürtem nem tashi agütsüsü atema lir.

Iba scheme kübok tetsürtem nem specialised training agütsüsü aser mezüngbuba küm asem nung senotsü teyaria agütsüsü.

Iba scheme kübok mezüng küm tetsür agents nem ita shia sen 7,000 agütsüsü, tanabuba küm ita shia sen 6,000 aser tasembuba küm ita shia sen 5,000 agütsüsü.

Iba scheme kübok küm asem atema Bima Sakhi lakh 2 shimtsü. Training agiba tembangba sülen parnok LIC agents inyaksü aser graduate ser alir Bima Sakhis bo LIC

nung Development Officer-a shimtsüa akok.

Ato kilonseri Bima Sakhis nem appointment certificates agütsüsü. Kasa sentong nung jembidang Ato kilonseri, linük nung tetsür crore 10 bo self-help groups balala nung züngsema lir aser tesüiba küm 10 tsüngda sorkari self help groups nem sen 8 lakh crore agütsüogo, ta metetdaksü.

Paisa, tetsür crore 1.15 bo Lakhpati Didi kümogo aser tetsür crore 3 Lakhpati Didi kümdaksütsüji pa nükjidong lir, ta metetdaksü.

Lakhpati Didi ya self-help group (SHG) nung dena alir tetsürtem lir aser sen lakh 1 dak tali income angurtem lir.

Kasa sentong nung Ato kilonseri Maharana Pratap Horticultural University, Karnal nung tongti campus atema foundation lung azüngtsü.

Taoba mapang Puducherry Chief Minister Ramachandran süogo

New Delhi, Luchii/December 09 (Agencies): Taoba mapang Puducherry nung Chief Minister, D R Ramachandran Amongnü aonung süogo; pa arrshi küm 90 liasü, ta Congress party-i metetdaksü.

Ramachandran ya anaben tashi Puducherry union territory nung chief minister inyaka liasü. 1980 küm mezüng pa chief minister inyak aser DMK-Congress teloktep sorkar nung pa küm asem chief minister inyaka liasü.

1990 küm nunga pa chief minister aküm ajisüaka DMK-Janata Dal teloktep sorkarji küm ka dang lirbo chirepa liasü.

Ramachandran-i DMK toktsü aser 2000 küm Congress nung adenba sülen 2001 küm territorial Assembly nung Speaker shim. Iba sülen pa Puducherry Pradesh Congress Committee nung tatong Tir shima liasü.

Puducherry PCC Tir aser Lok Sabha züngsem, V Vaithilingam-i Ramachandran

asüba atema mangyim jashi lemsatop.

Osangbener den jembidang Vaithilingam-i, Ramachandran-i nüburttem tenzüksü atema taküm bendanga agütsü aser pai sensakertem taküm jenjang ajungkettsüsü atema kanga nendaka inyakogo, ta metetdaksü.

Pa asüba ya Congress atema takoksa tulu asütsü, ta shia Vaithilingam-i mangyimer kibong züngsemtem den mangyim jashi lemsatop.

Syria nung telok ajaki telongjem atema inyaksü nungdak: MEA

New Delhi, December 09 (Agencies): Hombarnü ministry of external affairs (MEA)-i, India-i Syria nung tensa mita dang repringdar, ta ashiba den külemi telok ajak dang telongjem wazüka ayutsü asoshi inyaksü ayongzük.

"Tang tatalokbatem nung ajemdaker onoki Syria nung tensa mita dang repringdar. Syria nung telongjem aser litsü wazüka ayutsü atema telok ajaki inyaksüji tongtibang. Syria nung loktiliba ajak taginüba akhümtsüba yimjung nung yimtenren inyaksangshitsü onoki ajungshir," ta MEA sangdong ajanga metetdaksü.

"Damascus nung (Indian) Embassy-i India nungertem kümzüka alitsü atema tongtepratepa inyakdar," ta MEA sangdong nung shia lir.

Telungpur teloktemi Damascus atsünga agiba sülen Syria Tir Bashar al-Assad jena oa Russia nung jenokogo.

Taoba hopta India ministry of external affairs-i India

nungertem dang Syria linüki maotsü aser yangji alirtema tangsa iba linükji toktsür aotsü ajungshia liasü.

Tang Syria nung tensa mejungi aliba nung ajemdaker MEA-isa sensotem den helpline number ka lemsatepogo.

Honibarnü MEA-i sangdong ka ajanga, "Tang Syria tensa nung ajemdaker India nungertem dang sangdong tasen ka magütsü tashi iba linük jagi maotsü metetdaksür. Tang Syria nung aliba India nungertem danga Damascus nung aliba Indian Embassy den helpline number +963 993385973 (WhatsApp nunga angutsü) aser email hoc.damascus@mea.gov.in ajanga tongtepratepa alitsü metetdaksür," ta metetdakja liasü.

Amongnü Damascus nung Indian embassy-i, Syria nung India nung ajak kümzüka dang lir aser embassy-i parnok den tongtepratepa amalitepdar, ta metetdaksüogo.



December 09, 2024 nü Patna nung Bihar Congress Tir, Akhilesh Prasad Singh den party lenirtemi party lenir, Sonia Gandhi asoba anogomong amongdang tangokba noksa nung angur. Hombarnü Sonia Gandhi arrshi küm 78 jungogo.

Indian Foreign Secy Misri-i Bangladesh Foreign Secy den senden amen

New Delhi, December 09 (Agencies): Hombarnü Bangladesh yimtiba, Dhaka nung India Foreign Secretary, Vikram Misri-i Bangladesh Foreign Secretary, Mohammad Jashim Uddin den senden amen.

Bangladesh nung Hindu nungertem anema inyakba aser Hindu nung Tenla kitem kanga bulua amakba mapang ka nung pai Bangladesh semdang.

Taküm August ita nung Sheikh Hasina-i aniba sorkar chirepba mapang nungi tenzüka India aser Bangladesh na tsüngda tesendaktep mejungi lir.

Ano October ita nung Bangladesh nung Hindu putir, Chinmoy Krishna Das apuba sülen linük anaprongla nung Hindu nungertemi longkak aiter.

India sorkaria item tatalokba aitsüogo aser Bangladesh nung Mohammad Yunus-i aniba interim sorkar dang aibelenertem nem temerenshi agüjang ta mepishio.

Hombarnü Foreign Secretary, Misri Bangladesh yimtiba, Dhaka tonga aoba mapang nung Bangladesh Foreign Ministry nung tongti ketdangser kati pa agizüka liasü. Airport tonga aoba mapang Indian High Commissioner Pranay Verma-a liasü.

Bangladesh Foreign Secretary, Mohammad Jashim Uddin den senden amenba sülen Misri-i foreign minister Mohammad Touhid Hossain-a ajurutsü.

Misri-isa Bangladesh interim sorkar tongti mesüra Chief Adviser, Professor Muhammad Yunus-a ajurua senden amentsü.

Taküm August ita nung Bangladesh nung nüburttemi sorkar anema longkak sashia aitba mapang nung Sheikh Hasina-i linük toktsür ajentsüsa aküm. Hasina India nung jenokba sülen anogo ishika lir Nobel Peace award angur, Yunus interim sorkar nung tongti shima liasü.



December 09, 2024 nü Patna nung Bihar Engineering University convocation sentong nung Bihar Chief Minister, Nitish Kumar den deputy CM ana- Samrat Chaudhary aser Vijay Kumar Sinha nungeri kaketshirtem nem certificates agütsüdang tangokba noksa nung angur.



TIR YIMYIM YIMOBILEM (EDITORIAL)

DIMAPUR SANGTENNÜ, DECEMBER (LUCHII) 10, 2024

Kisama nung sentep alibaji junger

Nagaland nung Naga kin ajak küm nung khen adenshia Hornbill benjong amongdak Kisama nung taküm 2024 küm yakanü amongnü Christmas jeli sentong ka yanglua temoatsü sentep mapang agiba jagi Naga nunger dak tashimait aika liakasa Tsüngrem tsübuba shisatsü tajung ka sayuogo. Atangji, tenüng agidang Khristan asüba agi amongnü sentep sentong ka ayongzüka agiba agibo Tsüngrem mepelatsüa akok, ajisüaka Kisama nungbo Tsüngrema mali ama akhi tetsü tebou jilu bena dang yi jema yartsüngsanga dang mongra, ano ajisa tamajungba asütsü. Tang putu ya Naga nungertem tangar anululen alir tashitemeteterem jilu bennüba mapang lir, anungji achiajem nunga, sobusülemtsü nunga aser kentenmenü nunga asenok Aor mesüra Naga nunger ama masü saka anululen alirtem jilu bena dang linüba purtemji asenok kümogo. Iba jagi, Hornbill benjong nung asen sobaliba yartsüngsang yabo tangalen nungi arur raliwalirtem asoshi dang ashi, asenokibo tangar anululen alir temesüng oshi agidang parnok kensü nung parnok ken tena dang chiajema tsüngsangtsü janrar. Iba jagiang ano, Hornbill benjong aliba yagi tangar sobaliba nem asen sobaliba amoksepdaktsür amai külen kabo angur. Ajisüaka, tanü alima ajunga ya kibong ka dang ama akümer asünungji, koba sobaliba benshidir benshiang, peisasa pei shi azü azüokteta Tsüngrem tsübua alitsübajiang kanga tongtibang asütsü. Hornbill tenzüker taküm agi küm 25 ajunger aser taoba küm 24 tashi Kisama nungbo amongnüa mali ama, sentep tsüngtsünga matem, sentepa magi aser sarasadem mapang agiba mangashii aruogo. Aji oda, Kisama yim topur ajungtsü atema tenla ki mesüka ki tilakabo yanglua angu saka Kisama nungbo arogo mali, sannüker a mali anungji sentepa mali ta Kisamabo Nagaland nunga masü ama limapur yim kümer lia aruogo. Ibayongji, Kisama nung yi ayokba aser yi talubosa jema japujaritepba osang dang ashi Kisama nung Tsüngrem temeim bilemteta sentong agibabo mangashi. Ajisüaka, tanü küm 24 sülen Kisama agi japujariba yim ama kümer liaka, yangji Tsüngrem külemtsü bilemtetbaji Naga nunger yimten yimsüsürtem aser arogo lenirtemi anir Naga nunger nübortemi Tsüngrem temeim lepa bushia tenzüka mapang ka sūdaktünüa bilemer. Atangji, Nagaland government-i hornbill benjong ayongzüka akaba nükjidong tulutibajibo alima tesem balala nungi Naga nunger sobalibaren tapu balala reprangi raliwalirtem arudaktsüner, iba jagi parnok bendanger raliwalir mechi yi ayoktsü Kisama nungbo melaogo. Alima asünungji ajia kecha masü, ajisüaka asenok metettsüba kaji raliwalirtem adenshiba alima tesem tapu balala lir. Tesem karbo Thailand nung Bangkok ama alima japujari agi sünger teburi tetsür kümer pei mang ayoker. Kasaji raliwalirtem aika Bangkok ama bushia aobaji pie mang ayoker tetsür aser teburtem den kazütsü tebilemba nung aoer aser Thailand nungbo parnok asoshi aji kecha balaka masü, ayangba mapa ka dang lir. Ano, Israel ama limabo temeshi lima, anungji temeshi tesemtem sema oa sarasadema jajatsü asoshi alima tesem balala nungi raliwalirtem küm piyong senpet asener. Ano, alima tesem karbo ayong aser tenem agi sünga lir, anungji itemji repranga jajanüba raliwalirtema lir. Item indangji bilemdanga, asenok Kisama nung amongba hornbill benjong ya dang masü saka Nagaland ajunga ya raliwalirtem amongdak tesem tajung ka yanglutsü bilema sentong yanglutsübaji asenok asoshi tajangzük aketba mapa tajung ka asütsü. Asenoki raliwalirtem arurtemji asen limai yi bushia arur amai mebilemetsüla mesüra raliwalir arurtemji asenok sobaliba reprangi arur ser nung asenokbo par sabalibatem nungang tejangraba sayutsübaji asenok asoshi tamashi aser takoksa angutsüba mapa ka asütsü. Aji oda, tang Kisama nunga amongnü monga sentep agiba amaji, Nagaland ya raliwalirtem asoshi Tsüngrem aden metetba lima aser Naga nunger sobaliba aser Naga nunger otsü angazükdak tesem tajung ka kümdakja asenoki yanglutettsüla. Iba jagi Nagaland aser Naga nunger alima tsüngdang tali mera akettsü aser tashidak aser alima sobaliba tamajung aika nungi jenbuttsü.

OLEMSABANG

TIYAZÜ TESAYUBA AGI MASHILENI MANIDAKTSÜTSÜ KÜMDANGA MEITA LIDI

~ L. Kika Pongener.

Yisu alima nung alidang, kenu anogo pa olive tenem nung mena alidang, pa nutsüngtemi pa dangi arua asüngdang... "Na aruba aser alima tatem temaitsü kechi asütsü...??? Yisu-ashi..." Shinga-ia nenok mashileni manidaktsütsü kümdangang. Kechiaser kü tenung nung aikati ni Khrista ta jembia arutsü aser aika mashileni anitsü" (Mathi-24:4-5). "Aser tiyazü ainkar aika adoktsü aser aika mashileni anitsü" (Mathi-24:11). "Idangji nisung kari nenok dang, ajiang, yangi Khrista lir, mesura oagi lir...ta shira aji tamangma. Kechiaser tiyazü Khristan-tem aser tiyazü ainkartem adoktsü, aser kokra temeshipura mashileni anitsü asoshi temaitsü tulu aser tesungmangtsü sayutsü" (Mathi-24:23). Küm ishika sua ogo, China lima nung tetsür kati lai la sasa la-ji Yisu Khrista-a ta ashiba, sayatenya mapa tulu inyaka sayuba aser Yisu Khrista tanaben arutsü ta asüba-to aruogo ta sayutsüngiba aser sayatenya mapa tulu inyakba otsü/osang ka kanga bulua jembiba angazük. Atangji, iba ama otsü/osangtem yagi Yisu-ashi ama... Pa tanaben arutsüba mapang atonger sudi ta rajema angateter.

Tanü alima tesem kar nungbo, Kodak ya tamang yimsu (Religion) ajak meyong, tamang yimsu kechi amangdir amang-aka shirnoki tatem tashi shitak amangteter parnok ajak kodak jagi aotsü...ta tiyazü tesayuba ka sayutsüngiba angazük. Khristan yimsu amangba agi dang kodaki aotsü ta masü, Hindu, Muslim, Sikh aser Budhist etc. oda kechi yimsu amangdir amang-aka, shirnoki shitak amangteter parnok ajak Kodaki aotsü...ta tiyazü sayuba ka angazük. Tamang yimsu ya nungja balala dang ashi ajakji küsa dang...Tzübo (Water tank) ka nungi pipe line tesem balalai mesangshia bener aoba amai, saka ajakji tzübo ka nungi dang belenshiba dang ta sayutsüngiba angazük. Asenoki kodang iba ama tiyazü tesayubaji angashidir, laishiba den medemdanga bushitsüla. Ita ka-ana suiogo, Singapore nung Catholic, Sikh aser Muslim nunger lanurtem sentong ka nung, Pope Francis-i o jembiba osangkaket nung yamai züngshi..."Yimsu ajakji Tsüngrem ka indang jembiba oshi balala amai lir"...."Tamangba yimsu ajakji Tsüngrem dangi aniba lenmang". Ano paisa "Tsüngrem-ji ajak atema lir, asenok ajak Tsüngrem chirtem lir"...."Tsüngrem ka dang lir aser yimsu ajakji Tsüngrem ajurutsü atema jembiba oshi balala amai lir". Kar Sikh nunger, kar Muslim nunger, kar Hindu nunger aser kar Christian lir" ta jembiba angazük. Anungji iba o-ji America nunger Christian Putir Bishop Joseph Strickland-ibo kanga aitsüogo. Bishop Joseph Strickland-i Christian-tem dang... "Yisu-ji dang lenmang ta jangja-jangja shitettsü atema Pope Francis atema sarasademjang".... ta pai ayongzük. Anungji asenok tamangertem tiyazü tesayuba agi aibelena maotsü atema laishiba den medemdanga bushitsüla aser laishiba teti azüngtsüla.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Syria nung Khristantem atema tarutsü tia mejangjar



Syria kubok Aleppo yimti nung Khristantem jeli Khristmas sentong nung adendang tangokba noksa nung angur.

December 09, 2024: Islamic telungpur telok yimsüsüba kubok Syria nung Khristantem atema shisabulua bilemtsür, ta Khristan melungtet telok kati metetdaksü.

Syria nung küm aika civil war ajanga Khristan nütsung kanga ajema kümogo, aser tang Islamic telungpur Hay'at Tahrir al-Sham yimsüsüba kubok Khristantem tetsübu nung lir.

US aser UK natibo Hay'at Tahrir al-Sham ya kiralongrar organization ka lir ta sangdongogo. Hopta ka tejaklen kiralongrartemi Syria nung Aleppo yimti agiba sülen Honibar aonung Homs aser Damascus yimtia agia Syria sorkar atsüngdokogo.

Bashar al-Assad-i Tir menden nungi anenba sülen Honibar aonung tayimtsü ka nung Russia linüki jena ogo.

Hay'at Tahrir al-Sham teloki Aleppo yimti agiba mapang nungi tenzüka Khristan aika jena ogo saka Khristantem karibo maneni iba linük nung alitsü melungtetogo.

International Christian Concern (ICC) Tir, Jeff King-i, "Khristantem atema taruba anogotem aser hoptatemji kanga tongtibanng asütsü. Küm 2000 jungnüa tera yanga aliba linük nung Khristantem atema tarutsü tia mejangjai kümogo," ta metetdaksü.

Syria nung chiyungtsü aser tajemtsü tzü agi kanga anüngba agi nüburtem kanga timtemtedar, ta tanga osang ka ajanga metetdaksü.

Telungpur teloki nikongdang 5:00 ako nungi anepdang 5:00 ako tashi curfew ozüng benokogo, aser ibaji ajanga Khristantem densema senso ajak timtemer.

Kiyong kar nungbo gari tila nung angati amtsük aser tzü bener arua lemstür.

Damascus aser Aleppo na tsüngda tongti lenmang nokdangogo aser ibaji ajanga nisungtemi lenmang tamajung nung ang senzüsüsa akümer.

Yimti toktsür ajentsü merangertem rongnung Khristan doctor ka, Dr. Arwant Arslanian-a khasetogo, ta Armenians of Syria-i facebook post ka ajanga metetdaksü.

Lanur Khristantema telok ka bus nung aoba mapang nung Aleppo yimti lenmang nung nokdang aser tang parnok Syriac Orthodox Archdiocese nung jenoka lir.

Aleppo yimti nung Khristan lenirtembo aika jena moui Khristantem melung sünepja anepaludar. Syriac Orthodox Metropolitan Bishop, Mor Boutros Kassis densema Khristan lenirtemi social media ajanga tongtepratepa maneni sarasademdar. Parnoki Khristantem dang tasü itshir tamang agi iba tensa koktetsü ayongzüker.

Latin Arogo nungi Franciscan putir, Bahjat Karakach-i, "Kechi telemtetba agitsür Arogo dang nungibo nisungtemi temetetba. Aleppo yimti toktsür ajentsü mesüra maneni alitsüji nija aser kibongtem melung. Nisung kar atema kari telemtetba agitsütsü makok. Onok ama Tsüngrem tenzüksü bendanga agitsürtemibo yimti metoktsütsü aser tensa koba ajangshidir repranga alitsü," ta metetdaksü.

al-Qaeda nungi jakzüka Hay'at Tahrir al-Sham telokibo Khristantem densema civilian ajak kümzüksü, ta sangdongogo.

HTS lenir, Abu Mohammed al-Jolani-i Aleppo semdangba mapang nung, "Aleppo ya sobaliba yangertsü atema adenshiba tesem ka lir, aser maneni yamaji dang alitsü. Akhidang nungi yangi sobaliba aser yimsü balala amangertem tesünep nung alir," ta shiogo.

2011 küm Syria nung civil war tenzüka sülen Aleppo nung Khristan nütsung aija ajema kümogo, aser tangbo iba yimti nung Khristan 30,000 shi dang anünga lir.

Switzerland nung amenoka aliba Khristan melungtet telok Christian Solidarity International (CSI)-i, "HTS telok tangatetba aser tamalen parnoki inyakba apibo tang parnoki Aleppo nung minorities kümzüksü ta nangzükbaji mamangtetsüsa lir," ta ashi.

Tamalen-a HTS-i Syria tesem ajaklen Khristantem anema inyakogo aser

Khristantem meyong kiojen rakzükogo, ta CSI-i metetdaksü.

Tekülem sentong ka nung Armenian Catholic Church nung Archbishop, Boutros Marayati-i Khristantem dang, "Tsübu teli, adianutem. Telok ajaki onok nem tenanzükba agitsüogo. Kecha masü ama dang liang, kechiyong tensaji akhi ama kasa dang asütsü, tajungba dang akümtsüa akok," ta ashi.

Akhidang nungi Aleppo yimti nung Khristantemi Syria sorkar den amalitepa aruogo. Syria Tir Bashar al-Assad ya Khristantem densema minorities kümzüker ka liasü.

ANOGO ABEN TSÜNGREM DEN

Shisa tebulu, saka mita liang

"Ni shiba dak amangogo ni pa metet aser ni pa ket nung iba anogo asoshi kechisa nungloka yutsü, aji ni nüka alitsü akok" (2 Tim. 1: 12)

Khristan taküm nung ajungben ajungben inyakba ajanga atsünga odaktsür. Khristan takümüji asemtepba rara ka lir. Kündanga mita melira asenoki raratsü makok. Laishiba nung mita alitsü indang ashir kechiaser ibaji makaba ajanga atsünga aoba adoker. Ibr tapu 6 nung mita alitsü tongtibang lesson asem agütsür.

(a) Teimla nung tamang agi azüitetsüla (t.11). "Tasüba süshia, taküm süshia kotak tenyartem süshia, yimsüsürtem süshia, Kibuba Khrista Yisu dak aliba Tsüngrem temeim nungi asenok piladaksütsü makoktsü ta ni chichia amanger. (Rom 8:38, 39). Iba tamang agi asenok ajungshitaksütsüla. Ibai pei sasa dak temulung alemba masü saka Kibuba nung temulung alemba lir. Samatsü asoshi Pai asenok shimtet asü? Masü. Iba nung temulung lemanng. "Shibai nenok dak mapa tajung tenzuk, pai Yisu Khrista anogo tashi abensatsütsü" (Fill :6)

(b) Mita aliba tetezü, taremzuk tamang agizukba (t. 15). Asen meketa mepet kuli jagi asenoki angazuktsula (Ibri. 13:7). Missionary taküm otsü ajanga asenok tashi itdaktsür.

(c) Tsüngrem dak jenoka alibaji mita aliba (t. 18 -20). Pa asenok tanela rongnentsü. Pa adenba nung tejangja tashi ita alir. Kibubaji asenok jenokdak tashi tait mitsa lir. (A. Shin 18: 10). Khrista dak jenoka lira tsükchiri koda asenok dak kongshitet? Anungji shisa mebului mita dang lidi.

Texas Missions nung lenir, Joy Fenner alima nungi pilaogo

December 09, 2024: Woman's Missionary Union of Texas nungi missionary aser Baptist General Convention of Texas nung tetsürtem nungi mezüngbuba Tir, Joy Fenner Dallas nung lia süogo; la arrshi küm 89 liasü.

Fenner-i küm 20 tashi Woman's Missionary Union of Texas nung executive director-treasurer inyaka liasü aser la mapa nungi anisüngzüka sülen la nem executive director-treasurer emeritus nungja agütsü. 2009 küm la WMU of Texas Tir shima liasü.

"La dak sempet tajung aika aliba den külemi lai Khrista nem taküm bendanga agitsüba aser Khristai tenyaba wadang tulu nendaka inyakba ajanga lai Texas WMU kanga junga len aniego," ta la den külemi inyaksemer taoba mapang BGCT executive director, William M. Pinson Jr.-i metetdaksü.

Joy Phillips Fenner ya 1935 küm March 3 nü Avinger nung aso aser East Texas nung inteta liasü. La Paris Junior College nung zünga liasü.

La First Baptist Church Marshall nunga Secretary inyakba sülen Texas WMU nung state director inyaka liasü (1959 nungi 1966 küm tashi).

Tamalen Texas WMU aser BGCT naprongla nung Tir inyakla, Kathy Hillman-i, "Küm



Joy Fenner

aika nisung aikati Joy den külemi inyaksemtsü atema maangka angu. La ya shisataka, ajungmesor ka aser medemer tajung ka liasü," ta metetdaksü.

Joy aser Charlie Fenner na 1966 küm October 8 nü kibong akümba sülen tenaprongla 1980 küm tashi Fukuoka, Japan nung Southern Baptist missionaries inyaka liasü.

Texas WMU nung menden balala nung inyaker, Carolyn Porterfield-i Joy aser Charlie Fenner na mezüng Fukuoka nung ajurua liasü. Iba mapang nungi Porterfield, Kyoto yimti nung missionary liasü.

"Onok ajurutepba sülen küm ishika lir Joy-i kü dang WMU of Texas nung külemi tenzüksü atema asüngdanga liasü," ta Porterfield-i ashi.

"Joy-i kü dang missions indang tesayuba aika agütsü

aser Baptist tamanger ka taküm nung tetsürtem lenisüba indang lemsatepa liasü. Mapang kaka nungbo la ya kü 'kibur' ka ama ama liasü, saka la ya kü medemer tajung ka liasü," ta laisa metetdaksü.

Joy aser la kinüngbu na Texas-i meyipa aruba sülen 1981 küm January ita nung la Texas WMU nung executive director-treasurer aküm.

Taoba mapang BGCT executive director, William M. Pinson Jr.-i, "La Arogo staff inyakba, Texas WMU nung inyakba aser Japan nung missionary inyakba ajanga lai aika angazük, aser ibaji ajanga lai WMU of Texas nung executive lenir ka ama takok ngua inyak," ta ashi.

La Texas WMU nungi anisüngzüka sülen 2001 küm nungi 2003 küm tashi Tennessee WMU nung interim executive director inyaka liasü.

Amarillo nung 2007 küm BGCT senden nung la state convention Tir shima liasü.

Joy Fenner ya mapang talangka Dallas nung aliba Gaston Oaks Baptist Church nung züngsem liasü aser Gaston Christian Center indang board züngsem liasü.

2017 küm la kinüngbu Charlie asü. La tasü mang Dallas-Fort Worth National Cemetery nung la kinüngbu rema alidak külemi aremstü.

AO OSHI ANGAZÜKDAK:

TANÜ ANGAZÜKTSÜBA OJANG

Tatazü

(adv) tashi manga senzüba (indisciplined)

*Samarobai tsürabur ashi manga tatazü tanur ka aküm.

Tatem

(adj) mapa renemba, joko aotsü mali (end)

*Sentep sentong tatem küma ajaki sarasademer senshi.



OLONG PAITEP # 7006

1		2				3		4		5
				6						
	7		8							
9					10			11	12	
			13		14	15				
16					17			18		
			19		20					
21		22								23
24										

TIPIEN

- 1. Saku - (4)
- 6. Songjen - (7)
- 7. Mali/Tazüng - (4)
- 9. Tasen apok - (6)
- 11. Songtem - (3)
- 13. Ata liasü - (5)
- 16. Tzünglu den külemi tsüker - (3)
- 17. Aso tila - (6)
- 20. Tashi maküm - (4)
- 24. Tenüng kasa jatępba - (7)
- 25. Ki yangluba oset - (4)

LANGTSÜNGLEN

- 1. Taksep - (3)
- 2. Langtem - (5)
- 3. O tamendaktak - (4)
- 4. Nütsü tebuba - (3)
- 5. Anüngdang tesangwa - (3)
- 6. Apitet - (5)
- 7. Yagi jungdaksür - (4)
- 8. Anogo semer ka - (4)
- 10. --- tatsü - (3)
- 12. Tebur kidong aser zünga kasa tsüngda jatępba - (4)
- 14. Pela agizükba tapu ka - (5)
- 15. Tenüng atet - (3)
- 18. Mejanga onü - (5)
- 19. Talak techira - (4)
- 21. Maneni - (3)
- 22. Nübo teyi - (3)
- 23. Meshi - (3)

OLONG PAITEP # 7005 TELANGZÜBA

TIPIEN :

- 2. Pongsen, 5. Lepko, 7. Omen,
- 8. Maongka, 10. Yangkhu,
- 12. Senpong, 14. Angu,
- 15. Raksa, 16. Arameso,

LANGTSÜNGLEN :

- 1. Alimang, 2. Pongen,
- 3. Samaru, 4. Nün, 6. Pio,
- 9. Nüngdak, 10. Yongya,
- 11. Kongro, 13. Ora, 14. Ata.

NAI-A YA METETTER MA



December 5, 2024 nü YouTube nung Rosé aser Bruno Mars na music video "APT" 500 million views ajangogo. Tena indang collab single ya October 18, 2024 nikongdang 1:00 ako nung saya aser ita ka ser anogo 16 ser ghonda 21 nung 500 million views adenogo.

Iba dak alia "APT" ya YouTube nung tekaratiba nung 500 million views atongba K-pop music video lir. Tesüiba nung "APT" ajanga 400 million views atongba fastest female K-pop music video otsü ajateta liasü.

SC-i Manipur sorkar dang nungi osang tejangja meshir



Guwahati, December 9, 2024

(Agencies): December 9, 2024

nü Supreme Court-i Manipur sorkar dang kin o kin tsüngda rara nung kiojen raksaba aser atsünga agiba osang tejangja agütsütsü tetuyuba agütsüo.

State sorkari iba mapa inyakertem aser kiojen atsünga agirtem dak ozüng kübok mapa

inyakba osang SC-isa meshiogo.

Chief Justice Sanjiv Khanna aser Justice Sanjay Kumar na adenba bench-i January 20, 2025 nungi iba ken o angadangtsü lemtetogo.

Yaküm August ita SC-i taoba tetsür high court judges asem adenba luden ka tentettsü

aser parnok nem relief & rehabilitation maparen aser temenok agütsüba mapa ketdangsia reprangtsü tetuyuba agüja liasü.

SC-isa Maharashtra police chief Dattatray Padsalgikar dang ken o tem bushisüngdang agütsütsü tetuyuba agütsü.

May 3, 2023 nü hill districts nung 'Tribal Solidarity March' agidang kin o kin tsüngda mangatetep adoka rara tenzük aser tang tashi nung nisung 160 taküm samaogo aser noklang aika yiruogo.

Meitei nungeri Scheduled Tribe jenjang meshia takhangba agütsüba anema hill districts nung lungkak aitba sentong ayonga agia liasü.

Assam nung gari lenmang kilometre 31,800 aser apu 1400 yangluogo

Guwahati, December 9, 2024

(Agencies): Assam sorkari

scheme balala kübok gari lenmang kilometre 31,800 aser apu 1,400 yangluogo ta Chief Minister Himanta Biswa Sarma-i ashi.

"Iba ya Assam Growth Story lir aser scheme balala kübok road aser transport renlokogo. Assam Growth Story nung state kübok tesem ajak nung connectivity jungdaksütsübaji tongtipangba lir" ta CM Sarma-

i ashi.

State sorkari scheme balala kübok gari lenmang 9066 (kilometer 31,869) aser apu 1401 yangluogo.

Assam nung 4125 habitations (250+ population) geo-tagging süogo aser State Rural Roads Development Agency-i 3322 habitations mulunga agizükogo, item mapa ya PMGSY-IV kübok inyak ta CM Sarma-i metetdaksü. PM - Janjatiya Unnat Gram

Abhiyan kübok yimtsüng 652 nung 834 habitations aser aspirational districts nung 543 habitations agizüka lir ta pai ashi.

Deobarnü Chief Minister Sarma-i Palasbari aser Sualkuchi sendaktepba Loh Purush Bishnuram Medhi Setu atema Bhumi Pujan süogo.

Kilometre 12.2 talang apu ya Brahmaputra nung apu tibuba asütsü aser iba ajanga connectivity kanga tajungba aküimtsü.

Goalpara nung arem shititemi nisung 2 ajemset

Guwahati, December 9, 2024

(Agencies): Goalpara district kübok Narayanpara nung arem shidi ajanga kibong ka nung nisung ana tepset.

Iba lendong nung tasür ana

ya Ranjan Ray aser Rupali Ray na jangjaogo aser iba ajanga Goalpara district nung meimchirshidi khuret kanga ajuruba sayur.

Iba tesem nung alirtemi forest department ajanga mapa

shitak meinyaker ta tai tongloksür. Arem shidi kanga adokba ya mapang talangka tejaklen nungi lir saka ketdangsürtemi mapa kecha meinyaker ta parnoki ashi.

Ukhrul nung poppy lu ayimer nisung pezü apu



Imphal, December 9, 2024

(Agencies): Manipur Police-i central forces aser forest department den külemi ozüng alema opium lu ayimba anema inyakdang nisung pezü den prangpong apu.

Tesüiba ghonda 48 tsüngda Nagaland aser Myanmar den arrtsülen mita ao aser idangji ali acre 39.76 nung opium tema aliba alu raksatsü.

Manipur Police-i central

forces aser forest department ketdangsürtemi Khamason range, Ukhrul District nung mita aodang nisung opium lu ayimer nisung pezü apu.

Iba tesem nung ali acre 30 nung poppy tema aliba putet aser raksatsü.

Nisung pezüji Peimi Ramsak (27), Lightson Shimrah (49), Kapangkhu Khashim aser Yatei SV (22) nunger ta jangjaogo. Parnok ket nung air gun ka aser

kotari ana bena aliba apu.

Parnokisa Nagaland den arrtsü aliba Senapati district kübok Mao Pungdong nung ali acre 1 nung poppy alu raksatsü. Iba mapang Executive Magistrate liasü aser village chairman anema ken o benokogo.

Parnokisa December 5 nü Kangpokpi district kübok Makuilongdi aser Thonglang Atongba hill ranges nung ali acre 8.76 raksatsüo.

7buba Hornbill International Strongman & Crossfit competition takok nguag agiogo



7buba Hornbill International Strongman aser Crossfit competition 2024 nung takok angurtem aser asaya ayongertem tangokba noksa nung angur.

Dimapur, Luchii/December 9 (TYO): 25buba Hornbill Festival 2024 nung shilem ka ama Nagaland Strongman and Fitness Association (NSFA)-i ayongzüka December 7 nü CT Square, Chümoukedima nung 7buba Hornbill International Strongman and Crossfit (Men & Women) competition 2024 agiogo.

Strongman tetoktepba nung truck atsüba, deadlift, shoulder press, log squad, log race, farmers walk, tyre flip aser Naga stone densema liasü. Teburtem atema Naga

Crossfit challenge nung burpees, clean & jerk, chin up, dead lift, log lift squats, dumbbell front rise aser box jump densema liasü.

Tetsürtem tetoktepba nung clean & jerk, log squat, burpees aser box jump densema liasü.

Iba sentong nung Neingutuo Rio, secretary, Central Executive Board, Nationalist Democratic Progressive Party (NDPP) alakteta jaoker liasü.

Event partner tem rongnung Bodycraft Gym & Bodycraft Urban, Government of Nagaland, Nagaland Tourism, Department of Youth Resources

& Sports, World Strongman, Indian Sports & Fitness Society aser Federation India Strongman densema liasü.

Asava osang: Strongman

- 1st: Sedeviso Keretsü
- 2nd: Vikash
- 3rd: Kevidi Linyü

Cross Fit men

- 1st : Bisekhoto Gwiric
- 2nd: Merenso
- 3rd: Mesaroko Pier

Cross Fit Woman

- 1st: Manchen
- 2nd: Hatdeiphial
- 3rd: H.Wannya

1buba Hornbill Esports Championship tembangogo



FC24 (FIFA) tetoktepba akoksang Tiatoshi Lemtur takok marnok bener tangokba noksa nung angur.

Kohima, Luchii/December 9 (TYO): 1buba Hornbill Esports Championship 2024 kanga takok nguag tembangogo. Honibarnü asayamung shibangba sentong nung Union Minister of Labour & Employment & Youth Affairs & Sports, Dr. Mansukh L. Mandaviya-i tetoktepba nung takok angurtem nem sempet agüja liasü.

25buba Hornbill Festival 2024 nung shilem ka ama 1buba Hornbill E-sports Championship 2024 ya ayongzüka asayaogo.

Iba tetoktepba ya Department of Youth Resources & Sports Nagaland aser LVL UP Consultancy na longjemer December 6 aser 7 nü asaya liasü.

Hornbill Esports Championship Season 1 nung TWM Gaming-i, BGMI category koka liasü. Team nung

Dzieseser Suohu, Kezhangutuo Metha, Areeb Naiyar aser Akash Kumar nung densema liasü aser parnok nem senpet sen lakh 1.20 agütsüogo.

BGMI category nung Remorseless tanabuba aser Sin Official Mizo tasembuba nung liasü aser team ana nema senpet sen 60,000 aser 40,000 agüja liasü.

Vnom Esports pezübuba aser BO7S pongububa nung tembang aser parnok nema senpet sen 20,000 aser 15,000 agütsüogo.

Maneni trokbuba nung SEG Devguru (Rs. 10,000), tenetbuba nung Rising Underdogs (Rs. 9,000), tibuba nung SEG Esports (8,000, tekububa nung Sheleft Esports (Rs 7,000) aser terbuba nung Team XYZ (6,000) liasü.

TWM Gaming nungi Kezhangutuo (Lobster) nem

Most Valuable Player naroküm agütsü aser pa nema senpet sen 5000 agütsüogo.

DOTA 2 tetoktepba Nagaland nungi Generation of Miracles (GOM) team-i akok, aser parnok nem senpet sen lakh 1 agütsüogo.

GOM nungi asayartemji Pedelhutuo Nagi, Vizekhol Pucho, Abu Sothu, Vikepele Angami, Vimetha Kikhi, Imchayanger Amer, aser Lichon Ovung nung liasü.

Iba tetoktepba nung True Strike team tanabuba jenjang nung tembang aser parnok nema senpet sen 60,000 agütsüogo.

Maneni kasa tetoktepba nung Your New Feeders (YNF) aser Get Good Kid (GGK) na tasembuba aser pezübuba nung liasü aser team ana nem ya-a senpet sen 30,000 saer 10,000 agütsüogo.

Kasa mapang nung Tiatoshi Lemtur-i FC24 (FIFA) tetoktepba kokogo aser pa nem senpet sen 25,000 agütsüogo.

Iba tetoktepba nung Tongtiejet Yaden, Onjang Vaiphei, aser Pukhrabam Michael nung tanabuba, tasembuba aser pezübuba nung tembang aser parnok nema senpet sen 15,000, 7000 aser 3000 agütsüogo.

Angh La Ganesan-i "The Great Hornbill Run," tenzüksü

Dimapur, Yimpoksü/November 9 (Agencies): 4buba Nagaland 10k "The Great Hornbill Run," December 9 nü Multidiscipline Sports Stadium, Sovima Chümoukedima nungi tenzüka asemogo.

Iba asemtepba ya Nagaland Olympic Association, Athletics Federation of India tawabangba kübok Nagaland Athletic Association aser Department of Tourism, Government of Nagaland longjemer ayong aser of Baroda-i sponsor süa liasü.

Iba sentong nung Nagaland Angh alakteta jaoker liasü aser pai asayartem asayatsü asoshi sabang tajung lapoktsüba dang masü saka sobaliba balala longjemtsü aser temaba jenjang asoshi tokteptsü atema sabang agütsüba atema asaya ayongertem nem tenügsang agüja liasü.

Angh-isa, state sorkari grassroots level nung asayartem anitetsü atema jenjang agiba indang metetdaksü aser Nagaland nung South Asia Cross Country Championship aser 56th National Cross Country Championship 2022 ayongzüka asayatetba amala takoktem atema nema danga bilemba lemsatepa liasü.

Paisa, 2022 küm Best Association ama agizükba aser 2buba East Olympics Games, Meghalaya nung asayaba mapang state-i medal 23 anguba atema Nagaland Athletics Association nem tenügsang agüja liasü.

Kasa mapang nung General Manager & Zonal Head of NES Zone, Bank of Baroda, Sonam Tshering Bhutia-ia o tatsüka jembiba mapang, iba tesem nung saisapong balala nongita yaritsü atema bank bendanga agütsür lir ta ashi. "NE ya sempet tajung aketba asayartem anitetba tesem lir, shirnok dak national aser

international jenjang nung tokteptsü atema sempet lir," ta pai ashiba den tetoktepba nung shilem agirtem dang takok tuluba nguayonga aotsü atema nükjidong ayutsü ajungshia liasü.

December 9 nü asemtepba ya Senior 10km (Men & Women), Under-20 10km (Boys & Girls), aser Under-18 8km (Boys & Girls) ta category asem küma lemsar asem, aser telok ajak nung temaba jenjang nung tembangba nisung tenetnet nem senpet agüja liasü.

8km U- 18 tetsürtem: Chongsop P (Nagaland, 1st), Serlibon Teronpi (Assam, 2nd), Supei S (Nagaland,3rd)

8km U-18 teburtem- KH Zbed Hussian (Manipur, 1st), Harmon Timung (Assam, 2nd) aser Zhaizhovei Raima (Manipur, 3rd)

10km U-20 tetsürtem- H Wannya (Nagaland, 1st), Cekrotalu (Nagaland, 2nd) aser Samika Ronghangpi (Assam, 3rd)

10km U-20 teburtem- Thotngacheirin (Manipur, 1st), Takasanen Longkumer (Nagaland, 2nd) aser Temjensanen Pongen (Nagaland, 3rd)

10km tetsür- Tsuchoi T (Nagaland, 1st), Songmo P (Nagaland, 2nd) aser Peheiteie Esalung (Nagaland, 3rd)

10km teburtem- Daniel Lyngdoh Wahlang (Meghalaya, 1st), Wede T Mero (Nagaland, 2nd) aser Tsole Yhokha (Nagaland, 3rd).

Asaya metenzükdang Nagaland Athletics Association tir aser Athletics Federation of India Associate Vice President Abu Metha-i lokti pela agizükba o jembiba aser Sovima Village Council-i salem osang lemsatepa liasü. Sentong nungsa Technical Committee Convenor, Bithungo Kikon-i tepela o jembiba liasü.

BENDANGLI OSANG : Tapak 7 nungi...

S Korea tir Yoon linük adena maotsü...

Tir-i, state anemba tashitem aser yimden yimsüsüba nung parnok anemertem raktoktsü atema December 3 nü military nem emergency tashi agüja liasü.

Ajisüaka pai iba tetuyuba agütsür ghonda trok dang lir agin. Parliament-i iba ozüng agütsüba anemba sülen pai martial law ya agina liasü.

Iba ozüng agütsüba atema Yoon-i Honibarnü tatok meshiogo aser ashiba agi, iba tetuyuba agütsütsü kanga nüngdaka aliba agi agütsütsüa aküm.

Yoon-isa, martial law ya benoktsü nüngdaka liasü ta ashiba den National Assembly nung opposition-i pa kübok alirtem mapa nungi agintsü atema aiben merangba aser iba ajanga sorkar inyakyim nung tetsükdaksü adokba aser

sorkar inyakyim tongtiba nung kongshitsüsa budget achaayangba yimya nung aibelenba asoshi opposition aitsüogo.

North Korea aser Russia na tesendaktep kanga akanga küma North-i Ukraine den rara nung shilem agitsü atema sepai meyirejang aika yoka tang parnok meketa aliba tesem nung mepetmesü tulu adoker aliba mapang Seoul nunga iba mepetmesü ya adoker lir.

Kasa mapang nung South aser North Korea na tang tesendaktep kanga mejungi kümner lir. North-i Russia nem sepaitem agütsüba sülen South-ia Ukraine nem missile densema prangbong injang aser hadir balala agütsütsü atema asadangtsü ta shiogo.

BILEMDANGANG "Tia tensa ajak nung tangazüksü keta lir."